

# GIZA-ARLOAK

## IV

*Etxebarria, zer duk  
ire mendi goietan?  
Zer daukak zelaian...?  
Euskaldun arimea  
pozez, gañezka, al jabilk  
ire baserrian...?*

*Ibai, zugatz, arriak,  
alai, ortzirantz adi  
egunez urretan;  
lurraren izatetik  
ederreen erioa  
goizean intzetan.*

*Lurraren ederretik  
biotz garbia dator  
sendiko bizira;  
lagun edertasuna  
lurraren garrak dakar  
euzkoen argira.*

*Mendi, zelai, abere,  
gizonak lan ta jolas  
izketan dabiltezaz;  
pozez ta nekepean  
elkar indartzen dira  
biotzez ta itzaz.*

*Ardien arran-otsa,  
mendian belardian,  
entzuten goxoro;  
maitasuna jario  
nire asabeen lurrak  
larretik oparo.*

*Izkuntz zoragarria,  
lur bera letz sakona,  
aize antz bizkorra;  
sorpenik ederrena  
egin zendun kabia;  
izkuntz gizakorra.*

## V

*Gaztaroa eldu zen,  
ametsaren giarra,  
bizi, odoletan;  
Gazteiz ta Etxebarri,  
jakiturizko lurrak  
argi izprietan.*

*Nere gogo, zer nai duk?  
Aurrean duk Euzkadi,  
ire lur guztia.  
Euzko erri gorena,  
arazo aundietan,  
ama ta semia.*

*Otsoz inguratuta  
ikusten joat ama  
katai ugerretan;  
indarra duk lege  
leoi zapaltzailleentzat  
gogorkarietan.*

*Ostuka, lapurretan;  
jabiltzezak mutillak  
euskeraz mintzatzen;  
baiña zer eiten dugu  
izkuntzarik onena  
miñean erabiltzen...!*

*Gorrototan jausi nintzan.  
Gero agertuko zen  
gudaren erdian;  
Gotzaiñak esan zidan;  
salakuntz txarrak ditut  
politik bidean.*

*Gogoaren indarra  
egi bizitan neukan  
sorterri izkuntzan;  
ezin saldu neikean  
amaren odol itza  
etsaien bizertzan.*

**PAULIN**